



ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ
ՄՐԾԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎԻ
ԳԼԽԱՎՈՐ ՔԱՐՏՈՒՂԱՐ

Հայաստանի Հանրապետություն, 0010, ք. Երևան, Տիգրան Մեծի 4, հեռ.՝ (+374 60) 830 840, (+374 60) 830 850

Էլ-փոստ՝ info@competition.am, վեբ կայք՝ <http://www.competition.am>

«11» 11 2022թ.

No 007499

«ՀԻՔՐԻԴ ՓՐՈԴԱՔՇՆ ԷՆԴ ԴԻՍԹՐԻԲՅՈՒՇՆ» ՍԱՀՄԱՆԱՓԱԿ
ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ ՏՆՕՐԵՆ
ՊԱՐՈՆ ԱՐԹՈՒՐ ԱՄԻՐԽԱՆՅԱՆԻՆ
(Հասցե՝ ք. Երևան, Ա. Ահարոնյան 2, 5-րդ հարկ)

Հարգելի՛ պարոն Ամիրխանյան,

Կից ուղարկվում է Մրցակցության պաշտպանության հանձնաժողովի (այսուհետ՝ **Հանձնաժողով**)՝ 2022 թվականի նոյեմբերի 8-ի ««Հիքրիդ Փրոդաքշն Էնդ Դիսթրիբյուշն» սահմանափակ պատասխանատվությամբ ընկերության վերաբերյալ թիվ ՀԳ-01489/22 վարույթը կարճելու մասին» թիվ 427-Ա որոշման պատճենը:

Միաժամանակ տեղեկացնում ենք, որ Հանձնաժողով փաստաթղթեր ներկայացնել և ստանալ, ինչպես նաև Հանձնաժողովի հետ հետագա ողջ հաղորդակցությունը կարող եք իրականացնել նաև առցանց՝ Հանձնաժողովի e-Compete էլեկտրոնային համակարգի (այսուհետ՝ Համակարգ) միջոցով, որի համար անհրաժեշտ է գրանցվել Համակարգում՝ մուտք գործելով Հանձնաժողովի պաշտոնական կայքի (www.competition.am) «Իմ էջը» բաժին, ընտրելով «Գրանցվել» հրամանը և լրացնելով անձի նույնականացման համար պահանջվող տվյալները:

Առդիր՝ «12» թերթ:

ՀԱՐԳԱՆՔՈՎ՝

ԱՇՈՏ ՎԱՀԱՆՅԱՆ

Մրցակցության գնահատման և վերահսկողության վարչություն
Կարարող՝ Լուսինե Ղազարյան
Հեռ. (+374 60) 830-840 (231)



**ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ
ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎ**

Ո Ր Ո Շ ՈՒ Մ

08 նոյեմբերի 2022 թվականի թիվ 427-Ա

**«ՀԻՔՐԻԴ ՓՐՈԴԱՔՇՆ ԷՆԴ ԴԻՍԹՐԻԲՅՈՒՇՆ» ՍԱՀՄԱՆԱՓԱԿ ՊԱՏԱՍԽԱՆԱՏՎՈՒԹՅԱՄԲ
ԸՆԿԵՐՈՒԹՅԱՆ ՎԵՐԱԲԵՐՅԱԼ ԹԻՎ ՀԳ-01489/22 ՎԱՐՈՒՅԹԸ ԿԱՐՃԵԼՈՒ ՄԱՍԻՆ**

Մրցակցության պաշտպանության հանձնաժողովը (այսուհետ՝ **Հանձնաժողով**), 2022 թվականի նոյեմբերի 8-ի նիստում քննարկելով «Հիքրիդ փրոդաքշն Էնդ Դիսթրիբյուշն» սահմանափակ պատասխանատվությամբ ընկերության վերաբերյալ թիվ ՀԳ-01489/22 վարույթը կարճելու մասին հարցը,

Պ Ա Ր Զ Ե Ց

1. Վարույթի ընթացքի հակիրճ նկարագրությունը.

Հանձնաժողովը 2022 թվականի հուլիսի 19-ին ««Հիքրիդ ֓րոդաքշն Էնդ Դիսթրիբյուշն» սահմանափակ պատասխանատվությամբ ընկերության կողմից տնտեսական մրցակցության բնագավառում իրավախախտման վերաբերյալ վարույթ հարուցելու մասին» թիվ 265-Ա որոշմամբ հարուցել է թիվ ՀԳ-01489/22 վարույթ (այսուհետ՝ **Վարույթ**):

2. Վարույթի հարուցման առիթի և հիմքի հակիրճ նկարագրությունը.

«Վի Էմ Տելեպրոջեքթ» սահմանափակ պատասխանատվությամբ ընկերության (այսուհետ նաև՝ «**Վի Էմ Տելեպրոջեքթ**» **ընկերություն**) կողմից 2022 թվականի հուլիսի 1-ին տնտեսական մրցակցության բնագավառում հնարավոր իրավախախտման վերաբերյալ հաղորդում (այսուհետ նաև՝ **Հաղորդում**) է ներկայացվել Հանձնաժողով:

Վարույթը հարուցվել է «Հիքրիդ ֓րոդաքշն Էնդ Դիսթրիբյուշն» ընկերության վարքագծում գերիշխող դիրքի չարաշահման հատկանիշների առերևույթ առկայության հիմքով:

3. Հաղորդում ներկայացրած անձի դիրքորոշումը.

Հաղորդմամբ «Վի Էմ Տելեպրոգրեթ» ընկերությունը նշել է, որ համաձայն Հեռուստատեսության և ռադիոյի հանձնաժողովի պաշտոնական կայքում հրապարակված տեղեկատվության՝ «Հիբրիդ Փրոդաքշն Էնդ Դիսթրիբյուշն» սահմանափակ պատասխանատվությամբ ընկերությունը (այսուհետ՝ **«Հիբրիդ Փրոդաքշն Էնդ Դիսթրիբյուշն» ընկերություն**) հանդիսանում է «THT-Comedy» (THT), «THT4 international», «Friday international», «TB3 international» տեսալսողական ծրագրերի (այսուհետ համատեղ՝ **Տեսալսողական ծրագրեր**) դիստրիբյուտոր: Միաժամանակ, համաձայն Հաղորդման՝ «Հիբրիդ փրոդաքշն Էնդ դիսթրիբյուշն» ընկերությունը հանդիսանում է Տեսալսողական ծրագրերի միակ դիստրիբյուտորը Հայաստանի Հանրապետությունում:

«Վի Էմ Տելեպրոգրեթ» ընկերությունը հայտնել է, որ «Հիբրիդ Փրոդաքշն Էնդ Դիսթրիբյուշն» ընկերությունը Տեսալսողական ծրագրերի՝ Հայաստանի Հանրապետության տարածքում վերահեռարձակման թույլտվությունը ցանցային օպերատորների տրամադրում է խտրական գներով և պայմանագրերով պարտադրվում են պայմանագրի առակային չվերաբերող պայմաններ: Մասնավորապես, միևնույն տարածքում գործող և միևնույն չափանիշներով օժտված ցանցային տարբեր օպերատորներին «Հիբրիդ փրոդաքշն Էնդ դիսթրիբյուշն» ընկերություն Տեսալսողական ծրագրերի վերահեռարձակման իրավունքը տրամադրում է էապես տարբերվող արժեքներով, օրինակ՝ մի ցանցային օպերատորին տրամադրում է 40 000 դրամով, մեկ այլ ցանցային օպերատորին՝ 58 000 դրամով, մեկ ուրիշին՝ 120 000 դրամով կամ 300 000 դրամով:

Ըստ Հաղորդման՝ դիստրիբյուտորի կողմից նման կամայական մոտեցման հետևանքով տուժում են ոչ միայն ցանցային օպերատորները, այլև այլ դիստրիբյուտորները, ովքեր, առաջնորդվելով տնտեսական մրցակցության պաշտպանության օրենսդրության պահանջներով, ունենում են նվազ արդյունավետ գործունեություն:

Համաձայն Հաղորդման՝ «Հիբրիդ փրոդաքշն Էնդ դիսթրիբյուշն» ընկերությունը բացի ցանցային օպերատորների նկատմամբ խտրական գներ կիրառելու հանգամանքից, նաև պայմանագրի կողմին պարտադրում է վերջինիս համար ոչ շահավետ և պայմանագրի առարկային չառնչվող, տնտեսապես և տեխնոլոգիապես չհիմնավորված պայմաններ, որոնցից են.

- սահմանում են տուժանքներ պայմանագրի մյուս կողմի նախաձեռնությամբ պայմանագիրը դադարեցնելու համար,
- պայմանագրի կողմին զրկում են պայմանագիրը միակողմանի դադարեցնելու իրավունքից,
- ցանցային օպերատորը պարտավորվում է թույլատրել դիստրիբյուտորին իր մոտ իրականացնել աուդիտ:

Ամփոփելով՝ «Վի Էմ Տելեպրոգրեթ» ընկերությունը նշել է, որ «Հիբրիդ Փրոդաքշն Էնդ Դիսթրիբյուշն» ընկերությունը Հայաստանի Հանրապետության տարածքում Տեսալսողական

ծրագրերի միակ դիստրիբյուտորն է, ուստի ցանցային օպերատորները Տեսալսողական ծրագրերի վերահեռարձակման թույլտվություն ստանալու համար միայն վերջինիս հետ կարող են պայմանագիր կնքել: Ուստի, հաշվի առնելով Հաղորդամաք ներկայացված հանգամանքները՝ «Վի Էմ Տելեպրոգրեթ» ընկերությունը խնդրել է Հանձնաժողովին հարուցել վարույթ «Հիբրիդ Փրոդաքշն Էնդ Դիսթրիբյուշն» ընկերության կողմից հնարավոր իրավախախտումները պարզելու և դրանք վերանցնելու վերաբերյալ վերջինիս հանձնարարություն տալու նպատակով:

3. «Հիբրիդ փորդաքշն Էնդ դիսթրիբյուշն» ընկերության դիրքորոշումը.

«Հիբրիդ Փրոդաքշն Էնդ Դիսթրիբյուշն» ընկերությունը դիրքորոշմամբ հայտնել է, որ Հայաստանի Հանրապետություն Տեսալսողական ծրագրերի դիստրիբյուտոր է հանդիսանում «Международное развлекательное ТВ» ընկերության հետ 2021 թվականի մայիսի 3-ին կնքված լիցենզային պայմանագրի հիման վրա, որի համաձայն՝ Տեսալսողական ծրագրերը Հայաստանի Հանրապետության տարածքում վերահեռարձակելու բացառիկ իրավունքը «Հիբրիդ փորդաքշն Էնդ դիսթրիբյուշն» ընկերությանը տրամադրվել է 2021 թվականի սեպտեմբերի 1-ից:

Տեսալսողական ծրագրերի վերահեռարձակման իրավունքի տրամադրման գնագոյացման վերաբերյալ «Հիբրիդ Փրոդաքշն Էնդ Դիսթրիբյուշն» ընկերությունը նշել է, որ այդ կապակցությամբ 2021 թվականի օգոստոսի 20-ին դիմում է ներկայացրել Հանձնաժողով՝ խնդրելով տալ եզրակացություն իր կողմից առաջարկվող գնագոյացման մեխանիզմի վերաբերյալ, ինչին ի պատասխան Հանձնաժողովը 2021 թվականի հոկտեմբերի 26-ին ընդունել է ««Հիբրիդ Փրոդաքշն Էնդ Դիսթրիբյուշն» սահմանափակ պատասխանատվությամբ ընկերության դիմումի հիման վրա տնտեսական մրցակցությանն առնչվող հարցի վերաբերյալ» թիվ 310-Ա եզրակացությունը (այսուհետ՝ **Եզրակացություն**), համաձայն որի՝ «Հիբրիդ փորդաքշն Էնդ դիսթրիբյուշն» ընկերության կողմից յուրաքանչյուր ցանցային օպերատորին հատկացված լիցենզիայով նշված սփոման տարածքով և տվյալ սփոման տարածքում պոտենցիալ բաժանորդների թվով առաջնորդվելով գործակիցների սահմանումը չի կարող բացառել վերջինիս կողմից գերիշխող դիրքի չարաշահումը՝ ցանցային օպերատորների նկատմամբ խտրական պայմանների սահմանման և կիրառման միջոցով:

Համաձայն դիրքորոշման՝ հաշվի առնելով, որ Եզրակացությունը չէր բովանդակում որևէ հստակ գնագոյացման մեխանիզմի կիրառման խորհրդատվություն, միևնույն ժամանակ Տեսալսողական ծրագրերի իրավատիրոջ հետ կնքված պայմանագրում չունենալով իրավատիրոջ կողմից ցանցային օպերատորների համար գների կիրառման համար ցուցումներ՝ «Հիբրիդ փորդաքշն Էնդ դիսթրիբյուշն» ընկերությունը ստիպված է եղել առաջնորդվելու հետևյալ սկզբունքով. ցանցային օպերատորների հետ պայմանագրերը կնքել է այն նույն գներով, որոնցով վերջիններս մինչ այդ համագործակցել են Հայաստանի Հանրապետությունում Տեսալսողական ծրագրերի նախկին դիստրիբյուտոր «Վի Էմ

Տելեպրոջեքթ» ընկերության հետ: Միաժամանակ հաշվի առնելով այն հանգամանքը, որ «Հիբրիդ Փրոդաքշն Էնդ Դիսթրիբյուշն» ընկերությունը հնարավորություն չի ունեցել ծանոթանալու ցանցային օպերատորների և «Վի Էմ Տելեպրոջեքթ» ընկերության միջև կնքված պայմանագրերին, ուստի հիմք է ընդունել ցանցային օպերատորների կողմից ներկայացված տեղեկատվությունը: Գնագոյացման նման սկզբունք կիրառելիս «Հիբրիդ Փրոդաքշն Էնդ Դիսթրիբյուշն» ընկերությունը հաշվի է առել նաև այն հանգամանքը, որ Հանձնաժողովի կողմից «Վի Էմ Տելեպրոջեքթ» ընկերության նկատմամբ Տեսալսողական ծրագրերի վերահեռարձակման ժամանակահատվածի համար խտրական գների կիրառման փաստ չի արձանագրվել, և վարչական պատասխանատվության որևէ միջոց չի արձանագրվել: «Հիբրիդ Փրոդաքշն Էնդ Դիսթրիբյուշն» ընկերությունը հավելել է նաև, որ նման սկզբունքով պայմանագրերի կնքումը նպատակ է ունեցել նաև ցանցային օպերատորների համար գների բարձրացում չառաջացնելու:

Ինչ վերաբերում է պայմանագրի առարկայով չպայմանավորված, տեխնոլոգիապես և տնտեսապես չհիմնավորված, ոչ շահավետ պայմանների պարտադրմանը, «Հիբրիդ Փրոդաքշն Էնդ Դիսթրիբյուշն» ընկերությունը նշել է, որ իր և ցանցային օպերատորների միջև կնքված պայմանագրերի 9.5 կետի համաձայն՝ պայմանագրով ցանցային օպերատորի կողմից պայմանագրի 9.4 կետով չնախատեսված հիմքերով պայմանագիրը վաղաժամկետ դադարեցնելու դեպքում ցանցային օպերատորը «Հիբրիդ Փրոդաքշն Էնդ Դիսթրիբյուշն» ընկերությանը վճարում է հրաժարագին՝ պայմանագրի դադարեցման օրվանից սկսած մինչև պայմանագրի ժամկետի ավարտն ընկած ամիսների ամսավճարների հանրագումարի չափով:

Համաձայն դիրքորոշման՝ ցանցային օպերատորին պայմանագիրը միակողմանիորեն դադարեցնելու իրավասությունից զրկելու «Վի Էմ Տելեպրոջեքթ» ընկերության պնդումը ևս չի համապատասխանում իրականությանը, քանի որ ցանցային օպերատորների հետ կնքված պայմանագրերի 9.4, 9.7 կետերը նախատեսում են միակողմանի դադարեցման հիմքերը: Միաժամանակ, ցանցային օպերատորը պայմանագրում չնշված հիմքերով կարող է միակողմանի դադարեցնել պայմանագիրը՝ վճարելով հրաժարագին: Ինչ վերաբերում է ցանցային օպերատորի մոտ «Հիբրիդ Փրոդաքշն Էնդ Դիսթրիբյուշն» ընկերության կողմից աուդիտ իրականացնելու պահանջին, վերջինս նշել է, որ պայմանագրային պարտավորությունների կատարման նպատակով աուդիտի իրականացման պահանջը իրավատերերի կողմից լայնորեն կիրառվող պրակտիկա է: Եվ քանի որ Տեսալսողական ծրագրերի իրավատիրոջ (այսուհետ՝ **Իրավատեր**) հետ կնքված պայմանագրի 3.2.4 կետի համաձայն՝ իրավատերն իրավունք ունի տարին մեկ անգամ «Հիբրիդ Փրոդաքշն Էնդ Դիսթրիբյուշն» ընկերությունում անցկացնելու աուդիտ պայմանագրի կատարումը ստուգելու նպատակով, վերջինս ստիպված է եղել նման պայման սահմանել նաև ցանցային օպերատորների հետ կնքված պայմանագրերում, քանի որ «Հիբրիդ Փրոդաքշն Էնդ Դիսթրիբյուշն» ընկերությունը պայմանագրի կատարումն ապահովում է ցանցային օպերատորների միջոցով, և վերջիններիս կողմից թույլ տրված խախտումների համար

Իրավատիրոջ առջև պատասխանատու է «Հիբրիդ Փրոդաքշն Էնդ Դիսթրիբյուշն» ընկերությունը:

Ամփոփելով՝ «Հիբրիդ Փրոդաքշն Էնդ Դիսթրիբյուշն» ընկերությունը նշել է, որ բոլոր ցանցային օպերատորների հետ կնքվել են նույնական պայմանագրեր, նույն էական պայմաններով, իսկ որոշ չնչին բացառությունները, որոնք առկա են որոշ պայմանագրերում, արված են ոչ էական պայմանների մասով՝ հաշվի առնելով տվյալ ցանցային օպերատորի կառուցվածքային կամ կառավարման առանձնահատկությունները:

4. Հանձնաժողովի կողմից պահանջված և ստացված փաստաթղթերը և այլ տեղեկատվությունը.

Հանձնաժողովը 2022 թվականի հուլիսի 21-ին թիվ 003767 գրությամբ դիմել է «Հիբրիդ Փրոդաքշն Էնդ Դիսթրիբյուշն» ընկերությանը՝ 3 օրվա ընթացքում Հանձնաժողով ներկայացնելու Տեսալսողական ծրագրերի վերահեռարձակման իրավունքի տրամադրման նպատակով 2022 թվականին կնքված և գործող պայմանագրերի, համաձայնագրերի պատճենները, ինչպես նաև տեղեկատվություն Տեսալսողական ծրագրերի մասով Ընկերության կողմից կիրառված գնագոյացման մեխանիզմի մասին:

5. Գործի բազմակողմանի, լրիվ և օբյեկտիվ քննարկման արդյունքում Հանձնաժողովը հաստատված է համարում հետևյալ փաստական հանգամանքները.

1. 2021 թվականի սեպտեմբերի 1-ից Տեսալսողական ծրագրերի դիստրիբյուտոր է հանդիսանում «Հիբրիդ Փրոդաքշն Էնդ Դիսթրիբյուշն» ընկերությունը:

2. Հանձնաժողովը 2022 թվականի մայիսի 24-ի «Տեսալսողական մեդիայի ոլորտում տեսալսողական ծրագրերի դիստրիբյուտորների և ցանցային օպերատորների վարքագծի կանոնների վերաբերյալ ուղեցույցը հաստատելու մասին» թիվ 198-Ա որոշմամբ հաստատել է «Տեսալսողական մեդիայի ոլորտում տեսալսողական ծրագրերի դիստրիբյուտորների և ցանցային օպերատորների վարքագծի կանոնների վերաբերյալ» ուղեցույցը (այսուհետ՝ **Ուղեցույց**):

3. «Հիբրիդ Փրոդաքշն Էնդ Դիսթրիբյուշն» ընկերությունը 2022 թվականի օգոստոսի 18-ին էլեկտրոնային փոստի միջոցով Հանձնաժողովին տրամադրել է բոլոր այն տեսալսողական ծրագրերի դիստրիբյուցիայի պայմանների հրապարակման հղումները, որոնց դիստրիբյուտորն է հանդիսանում վերջինս:

4. Ուղեցույցի 25-րդ կետի համաձայն՝ 2022 թվականի հուլիսի 1-ի դրությամբ Ծրագրերի դիստրիբյուտորների և ցանցային օպերատորների միջև կնքված և գործող պայմանագրերը վերանայվում և համապատասխանեցվում են վերջիններիս կողմից համապատասխանաբար հրապարակված Չափանիշներին, Պայմաններին և բաժանորդների քանակին մինչև 2022 թվականի դեկտեմբերի 31-ը ներառյալ:

6. Վարչական վարույթի փաստական հանգամանքների և վերաբերելի իրավական նորմերի ուսումնասիրության և վերլուծության արդյունքում Հանձնաժողովը եզրահանգում է հետևյալին.

1) Ապրանքային շուկա սահմանելու հարցի կապակցությամբ.

ա. Ապրանքային շուկայի հատկորոշումը.

«Տնտեսական մրցակցության պաշտպանության մասին» օրենքի (այսուհետ՝ **Օրենք**) 3-րդ հոդվածի 1-ին մասի 4-րդ կետի համաձայն՝ ապրանքային շուկան որոշակի տարածքում ապրանքի և դրա փոխադարձ փոխարինելի ապրանքների շրջանառության ոլորտն է, որի սահմանները որոշվում են համապատասխան տարածքում ապրանքի ձեռքբերման, իրացման կամ արտադրման, տնտեսական կամ այլ հնարավորություններով կամ նպատակահարմարությամբ և դրա սահմաններից դուրս այդպիսի հնարավորությունների կամ նպատակահարմարության բացակայությամբ: Ապրանքային շուկան բնութագրվում է ապրանքատեսակային ու աշխարհագրական սահմաններով, ուսումնասիրության ժամանակահատվածով, դրա սուբյեկտների կազմով և ծավալով:

Օրենքի 3-րդ հոդվածի 1-ին մասի 5-րդ կետի համաձայն՝ ապրանքային շուկայի ապրանքատեսակային սահմանը տվյալ ապրանքի և դրա փոխադարձ փոխարինելի ապրանքների ամբողջությունն է:

Օրենքի 3-րդ հոդվածի 1-ին մասի 6-րդ կետի համաձայն՝ ապրանքային շուկայի աշխարհագրական սահմանը որոշակի աշխարհագրական տարածք է (այդ թվում՝ ճանապարհ, օդային, ջրային, ցամաքային և այլ երթուղի), որի շրջանակում տնտեսապես հնարավոր կամ նպատակահարմար է ձեռք բերել, իրացնել կամ արտադրել տվյալ ապրանքը և դրա փոխադարձ փոխարինելի ապրանքները, և առկա չէ այդ հնարավորությունը կամ նպատակահարմարությունը տվյալ տարածքից դուրս: Ապրանքային շուկայի աշխարհագրական սահմանը կարող է ներառել Հայաստանի Հանրապետության ամբողջ տարածքը կամ դրա մի մասը կամ Հայաստանի Հանրապետության (կամ դրա մի մասի) և այլ պետության (կամ դրա մի մասի) տարածքը:

Օրենքի 3-րդ հոդվածի 1-ին մասի 3-րդ կետի համաձայն՝ փոխադարձ փոխարինելի ապրանքները ապրանքներ են, որոնք կարող են համեմատվել ըստ իրենց գործածության նշանակության, կիրառման, որակական, տեխնիկական, գնային կամ այլ հատկանիշներով այնպես, որ ձեռք բերողը սպառման գործընթացում կամ արտադրական նպատակներով օգտագործման ընթացքում փաստացի փոխարինում է կամ պատրաստ է փոխարինելու դրանք մեկը մյուսով:

Հանձնաժողովի՝ 2022 թվականի հուլիսի 12-ի ««Վի Էմ Տելեպրոգրեք» սահմանափակ պատասխանատվությամբ ընկերության վերաբերյալ թիվ գործ-12/21 վարույթը կարճելու մասին» թիվ 250-Ա որոշման համաձայն՝ ««THT-Comedy/THT-International» հեռուստաալիքի վերահեռարձակման իրավունքի տրամադրում» ապրանքային շուկայի (այսուհետ՝ **Ապրանքային շուկա**) ապրանքատեսակային սահման է ճանաչվել ցանցային օպերատորներին «THT-Comedy/THT-International» հեռուստաալիքի վերահեռարձակման

իրավունքի տրամադրման ծառայությունը, իսկ աշխարհագրական սահմանը՝ Հայաստանի Հանրապետությունը:

բ. Ապրանքային շուկայի սուբյեկտների կազմը և ծավալը.

Հաշվի առնելով այն հանգամանքը, որ 2021 թվականի սեպտեմբերի 1-ից Հայաստանի Հանրապետության տարածքում Հեռուստաալիքի դիստրիբյուցիայի բացառիկ իրավունքը տրամադրված է եղել «Հիբրիդ Փրոդաքշն Էնդ Դիսթրիբյուշն» ընկերությանը՝ վերջինս տիրապետել է Ապրանքային շուկայի 100 տոկոսին:

2) Վարչական վարույթում ներգրավված տնտեսվարող սուբյեկտների շուկայական դիրքի կապակցությամբ.

Օրենքի 7-րդ հոդվածի 1-ին մասի համաձայն՝ տնտեսվարող սուբյեկտն ապրանքային շուկայում համարվում է մենաշնորհի դիրք ունեցող, եթե, որպես իրացնող կամ ձեռք բերող չունի մրցակից:

Հանձնաժողովի՝ 2021 թվականի սեպտեմբերի 28-ի «Տնտեսվարող սուբյեկտի մենաշնորհի և գերիշխող դիրքի որոշման մեթոդաբանությունը և կարգը սահմանելու մասին և Տնտեսական մրցակցության պաշտպանության պետական հանձնաժողովի 2011 թվականի մայիսի 23-ի թիվ 194-Ն որոշումն ուժը կորցրած ճանաչելու մասին» թիվ 264-Ն որոշման համաձայն՝ մրցակից չունեցող է համարվում այն տնտեսվարող սուբյեկտը, որը գործում է բացառիկ կամ փաստացի միակ լիցենզիայի, թույլտվության կամ իրավունքի հիման վրա (...):

Հաշվի առնելով Հեռուստաալիքի՝ Հայաստանի Հանրապետությունում տարածման բացառիկ իրավունքի առկայությունն ու վերոնշյալ իրավանորմերը՝ «Հիբրիդ Փրոդաքշն Էնդ Դիսթրիբյուշն» ընկերությունը 2022 թվականի հունվարի 1-ի դրությամբ Ապրանքային շուկայում ունեցել է մենաշնորհի դիրք:

3) «Հիբրիդ Փրոդաքշն Էնդ Դիսթրիբյուշն» ընկերության կողմից իրավախախտում կատարված լինելու հարցի կապակցությամբ.

Օրենքի 8-րդ հոդվածի 1-ին մասի համաձայն՝ արգելվում է տնտեսվարող սուբյեկտների կողմից մենաշնորհի կամ գերիշխող դիրքի (այսուհետ՝ գերիշխող դիրք) չարաշահումը:

Օրենքի 8-րդ հոդվածի 2-րդ մասի համաձայն՝ գերիշխող դիրքի չարաշահում է համարվում՝

1) իրացման կամ ձեռքբերման չհիմնավորված կամ խտրական գների սահմանումը կամ կիրառումը կամ օրենսդրությանը հակասող առևտրի այլ պայմանների ուղղակի կամ անուղղակի պարտադրումը.

5) այլ տնտեսվարող սուբյեկտների կամ սպառողների նկատմամբ խտրական պայմանների (այդ թվում՝ գների) սահմանումը կամ կիրառումն այլ հավասար պայմաններում.

6) պայմանագրի կողմին կամ պայմանագիր կնքել ցանկացող անձին, ներառյալ՝ առևտրի օբյեկտներին, իրենց համար ոչ շահավետ կամ պայմանագրի առարկային չվերաբերող տնտեսապես և (կամ) տեխնոլոգիապես չհիմնավորված պայմաններ պարտադրելը”

10) այնպիսի պայմանների առաջարկը կամ կիրառումը, որոնք առաջացնում են կամ կարող են առաջացնել խտրական պայմաններ այն դեպքում, երբ համանման պայմաններ չեն առաջարկվել տվյալ ապրանքային շուկայում գործող մյուս տնտեսավարող սուբյեկտներին.

13) չհիմնավորված բարձր կամ չհիմնավորված ցածր գների սահմանումը և (կամ) կիրառումը.

16) այլ պայմանների կամ վարքագծի սահմանումը կամ կիրառումը, որոնք հանգեցնում են կամ կարող են հանգեցնել տնտեսական մրցակցության կանխմանը, սահմանափակմանը կամ արգելմանը:

Վերոգրյալ նորմերից բխում է, որ օրենսդիրը Օրենքի 8-րդ հոդվածով սահմանել է գերիշխող դիրքի չարաշահումների դրսևորման մասնավոր եղանակներ և ամրագրել, որ այդպիսի գործողություններն արգելվում են:

Օրենքի 3-րդ հոդվածի 1-ին մասի 25-րդ կետի համաձայն՝ խտրական պայմանները ապրանքային շուկա մուտք գործելու, արտադրության, փոխանակման, սպառման, իրացման կամ ապրանքի այլ կերպ փոխանցման պայմաններն են, որոնք տնտեսվարող սուբյեկտի կամ սպառողի համար ստեղծում են անհավասար մրցակցային պայմաններ կամ անհավասար դրություն այլ տնտեսվարող սուբյեկտի կամ սպառողի համեմատությամբ:

Սույն գործի փաստերի համաձայն՝ «Հիբրիդ Փրոդաքշն Էնդ Դիսթրիբյուշն» ընկերությունը 2021 թվականի սեպտեմբերի 1-ից մինչև Վարույթի հարուցման պահը Տեսալսողական ծրագրերի վերաբերյալ պայմանագրային հարաբերություններ է ունեցել թվով 30 ցանցային օպերատորների հետ, որոնց հետ կնքված պայմանագրերի համաձայն՝ Տեսալսողական ծրագրերի վերահեռարձակման իրավունքի տրամադրման արժեքը տատանվել է 2021 թվականի սեպտեմբերի 1-ից մինչև 2021 թվականի դեկտեմբերի 31-ն ընկած ժամանակահատվածի համար 50 000 դրամից մինչև 2 400 000 դրամի սահմաններում, իսկ 2022 թվականի սեպտեմբերի 1-ից մինչև 2022 թվականի դեկտեմբերի 31-ն ընկած ժամանակահատվածի համար՝ 50 000 դրամից, մինչև 2 760 000 դրամի սահմաններում: Ընդ որում, 2022 թվականի համար սահմանված պայմանագրային արժեքը միշտ 15 տոկոսով գերազանցել է 2021 թվականի սեպտեմբեր-դեկտեմբեր ամիսների համար սահմանված արժեքից: Միաժամանակ, ցանցային օպերատորների հետ կնքված պայմանագրերում և դրանց կից հավելվածներում որևէ նշում առկա չէ ցանցային օպերատորների բաժանորդների քանակի մասին:

Վերոնշյալի համատեքստում էական է հետևյալ հարցադրումների պարզաբանումը.

1. Արդյո՞ք տեսալսողական ծրագրերի վերահեռարձակման իրավունքի տրամադրման նպատակով ցանցային օպերատորների հետ կնքվող պայմանագրերի շրջանակներում դիստրիբյուտորները պարտավոր են սահմանել գնի որոշման հստակ չափանիշներ:

2. Արդյո՞ք առկա է դիստրիբյուտորի կողմից տեսալսողական ծրագրերի վերահեռարձակման իրավունքի տրամադրման նպատակով կնքվող պայմանագրերի շրջանակներում առանց հստակ չափանիշների առկայության գնի սահմանման միջոցով հնարավոր իրավախախտման հատկանիշների քննարկման անհրաժեշտություն՝ հաշվի առնելով Հանձնաժողովի՝ 2022 թվականի մայիսի 24-ի «Տեսալսողական մեդիայի ոլորտում տեսալսողական ծրագրերի դիստրիբյուտորների և ցանցային օպերատորների վարքագծի կանոնների վերաբերյալ ուղեցույցը հաստատելու մասին» թիվ 198-Ա որոշումը:

Առաջին հարցադրման կապակցությամբ.

Հանձնաժողովը, հաշվի առնելով այն հանգամանքը, որ բազմիցս մի շարք վարույթների շրջանակներում անդրադարձ է կատարել դիստրիբյուտորների կողմից տեսալսողական ծրագրերի տարածման իրավունքի տրամադրման շրջանակներում ցանցային օպերատորների հետ պայմանագրային հարաբերությունների շուրջ ծագած խնդիրներին, այդ թվում՝ գնագոյացման մեխանիզմներին և խտրական պայմանների կիրառմանը, 2022 թվականի մայիսի 24-ի «Տեսալսողական մեդիայի ոլորտում տեսալսողական ծրագրերի դիստրիբյուտորների և ցանցային օպերատորների վարքագծի կանոնների վերաբերյալ ուղեցույցը հաստատելու մասին» թիվ 198-Ա որոշմամբ հաստատել է Տեսալսողական մեդիայի ոլորտում տեսալսողական ծրագրերի դիստրիբյուտորների և ցանցային օպերատորների վարքագծի կանոնների վերաբերյալ ուղեցույցը (այսուհետ՝ **Ուղեցույց**), որը նպատակ ունի.

1) առավել որոշակի և կանխատեսելի դարձնել դիստրիբյուտորների և ցանցային օպերատորների վարքագիծը.

2) ապահովել դիստրիբյուտորների և ցանցային օպերատորների գործողությունների շրջանակում առկա խնդիրների վերաբերյալ Հանձնաժողովի կողմից իրականացվող վարույթների համար անհրաժեշտ ապացուցողական լրացուցիչ մեխանիզմներ.

3) կանխել Օրենքով նախատեսված իրավախախտումները:

Ուղեցույցի 17-րդ կետի համաձայն՝ դիստրիբյուտորները տնտեսական մրցակցության օրենսդրության պահանջներին համապատասխան գործունեություն ծավալելու նպատակով պաշտոնական կայքէջում, իսկ դրա բացակայության դեպքում՝ հայտարարությունների տեղադրման կայքերում յուրաքանչյուր տարի՝ մինչև հունվարի 15-ը ներառյալ, իսկ սույն ուղեցույցի ընդունումից հետո առաջին անգամ հրապարակելու դեպքում մինչև 2022 թվականի հունիսի 15-ը հրապարակում են տեղեկատվություն Պայմանների և

¹ Դիստրիբյուտորների կողմից մշակվող՝ ծրագրերի տարածման իրավունքի տրամադրման նպատակով կնքվելիք պայմանագրերի էական պայմաններ:

Չափանիշների: վերաբերյալ՝ դրանց հրապարակման կայքի մասին տեղեկացնելով իրենց դիմած ցանցային օպերատորներին:

Ուղեցույցի 20-րդ կետի համաձայն՝ ցանցային օպերատորները տնտեսական մրցակցության օրենսդրության պահանջներին համապատասխան գործունեություն ծավալելու նպատակով պաշտոնական կայքէջում, իսկ դրա բացակայության դեպքում՝ հայտարարությունների տեղադրման կայքերում յուրաքանչյուր տարի՝ մինչև հունվարի 15-ը ներառյալ, իսկ սույն ուղեցույցի ընդունումից հետո առաջին անգամ հրապարակելու դեպքում՝ մինչև 2022 թվականի հունիսի 15-ը հրապարակում են տեղեկատվություն իրենց կողմից մատուցվող տեսալսողական ծրագրերի վերահեռարձակման ծառայություններից օգտվող բոլոր բաժանորդների քանակի վերաբերյալ՝ դրա հրապարակման կայքի մասին տեղեկացնելով տեսալսողական ծրագրերի դիստրիբյուտորներին:

Ուղեցույցի 21-րդ կետի համաձայն՝ այն ցանցային օպերատորները, որոնք նախատեսում են դիստրիբյուտորների հետ համագործակցել՝ հիմք ընդունելով իրենց կողմից վերահեռարձակվող Ծրագրերի տարբեր փաթեթներում ընդգրկված բաժանորդների քանակը, պետք է նույն ժամկետում հրապարակեն տեղեկատվություն նաև այդ մասով՝ նշելով յուրաքանչյուր փաթեթի անվանումը (փաթեթի անվանումը պետք է հստակ նույնականացվի ցանցային օպերատորի կողմից սպառողների առաջարկվող փաթեթի հետ) և տվյալ փաթեթում ընդգրկված բաժանորդների քանակը:

Վերոնշյալից հետևում է, որ տեսալսողական ծրագրերի դիստրիբյուտորը պետք է սահմանի հստակ մշակված պայմաններ և չափանիշներ, որոնցով որոշում է տեսալսողական ծրագրերի վերահեռարձակման իրավունքի տրամադրման ծառայության գինը: Ավելին, վերջինս պետք է դրանք հրապարակի ցանցային օպերատորների համար հասանելի աղբյուրներում և վերջիններիս տեղեկացնի դրանց մասին:

Երկրորդ հարցադրման կապակցությամբ.

«Հիբրիդ Փրոդաքշն Էնդ Դիսթրիբյուշն» ընկերությունը 2022 թվականի օգոստոսի 18-ին էլեկտրոնային փոստի միջոցով Հանձնաժողովին տրամադրել է բոլոր այն տեսալսողական ծրագրերի դիստրիբյուցիայի պայմանների հրապարակման հղումները, որոնց դիստրիբյուտորն է հանդիսանում «Հիբրիդ Փրոդաքշն Էնդ Դիսթրիբյուշն» ընկերությունը: Համաձայն հրապարակված տեղեկատվության՝ «Հիբրիդ Փրոդաքշն Էնդ Դիսթրիբյուշն» ընկերությունը Տեսալսողական ծրագրերի վերահեռարձակման իրավունքի տրամադրման արժեքը սահմանել է 50 դրամ՝ առանց ԱԱՀ՝ մեկ բաժանորդի համար՝ ցանցային օպերատորի կողմից դրանց՝ փաթեթով ձեռքբերելու դեպքում: Փաթեթից դուրս Տեսալսողական ծրագրերի յուրաքանչյուրի վերահեռարձակման իրավունքի տրամադրման համար «Հիբրիդ Փրոդաքշն

² Ծրագրերի դիստրիբյուտորների կողմից վարվող գնային քաղաքականության չափանիշներն ու սկզբունքները, որոնցով սահմանվում են յուրաքանչյուր ծրագրի կամ ծրագրերի փաթեթի դեպքում գնագոյացման հստակ մեխանիզմները և ծրագիրը կամ ծրագրերի փաթեթը տրամադրելու պայմանները:

էնդ Դսիթրիթյուն» ընկերությունը սահմանել է հետևյալ գները՝ առանց ԱԱՀ՝ մեկ բաժանորդի համար.

- «THT-Comedy» - 40 դրամ,
- «THT4 International» - 10 դրամ,
- «Friday International» - 20 դրամ,
- «TB-3 International» - 10 դրամ:

Միաժամանակ «Հիթիդ Փրոդաքշն Էնդ Դսիթրիթյուն» ընկերությունը նշել է, որ անկախ բաժանորդների քանակից՝ նվազագույն ամսական արժեքը կազմում է 40 000 դրամ:

Ուղեցույցի 25-րդ կետի համաձայն՝ 2022 թվականի հուլիսի 1-ի դրությամբ Ծրագրերի դիստրիբյուտորների և ցանցային օպերատորների միջև կնքված և գործող պայմանագրերը վերանայվում և համապատասխանեցվում են վերջիններիս կողմից համապատասխանաբար հրապարակված Չափանիշներին, Պայմաններին և բաժանորդների քանակին մինչև 2022 թվականի դեկտեմբերի 31-ը ներառյալ:

Վերոնշյալից հետևում է, որ անկախ դիստրիբյուտորների և ցանցային օպերատորների միջև նախկինում կնքված և գործող պայմանագրային դրույթների բովանդակությունից՝ Հանձնաժողովը վերջիններիս հնարավորություն է ընձեռել մինչև 2022 թվականի դեկտեմբերի 31-ը կնքելու Ուղեցույցի պահանջներին համապատասխան նոր պայմանագրեր, կամ առկա պայմանագրերը համապատասխանեցնելու Ուղեցույցի պահանջներին, որպիսի պայմաններում իրավախախտման հատկանիշների առկայության քննարկման անհրաժեշտությունը բացակայում է մինչև 2022 թվականի դեկտեմբերի 31-ը:

Օրենքի 80-րդ հոդվածի 1-ին մասի 1-ին կետի համաձայն՝ տնտեսական մրցակցության բնագավառում իրավախախտման վերաբերյալ վարույթի հարուցումը ենթակա է մերժման, եթե բացակայում է խախտման դեպքը:

Օրենքի 89-րդ հոդվածի 1-ին մասի 2-րդ կետի համաձայն՝ տնտեսական մրցակցության բնագավառում իրավախախտման վերաբերյալ վարույթը ենթակա է կարճման, եթե առկա է վարույթի հարուցումը մերժելու որևէ հիմք:

Հաշվի առնելով վերոշարադրյալը՝ Հանձնաժողովն արձանագրում է, որ մինչև 2022 թվականի դեկտեմբերի 31-ը Ուղեցույցի պահանջներին համապատասխան նոր պայմանագրեր կնքելու, կամ առկա պայմանագրերը Ուղեցույցի պահանջներին համապատասխանեցնելու Հանձնաժողովի կողմից տրված հնարավորության պայմաններում Վարույթը ենթակա է կարճման:

6. Եզրափակիչ մաս.

Հիմք ընդունելով վերոգրյալը և ղեկավարվելով Օրենքի 90-րդ հոդվածի 1-ին մասի 3-րդ կետով, 67-րդ հոդվածի 2-րդ մասով, «Վարչարարության հիմունքների և վարչական վարույթի մասին» օրենքի 70-րդ և 71-րդ հոդվածներով, ինչպես նաև Հայաստանի Հանրապետության վարչական դատավարության օրենսգրքի 72-րդ հոդվածի 1-ին մասի 1-ին կետով՝ Հանձնաժողովը


በገበያ

1. Կարճել թիվ ՀԳ-01489/22 վարույթը:
2. Սույն որոշումն ուժի մեջ է մտնում դրա պատճենը համապատասխանաբար «Հիբրիդ Փրոդաքշն Էնդ Դիսթրիբյուշն» սահմանափակ պատասխանատվությամբ ընկերությանը հանձնելուն հաջորդող օրվանից:
3. Սույն որոշումը կարող է բողոքարկվել վարչական կամ դատական կարգով՝ ուժի մեջ մտնելու պահից երկամսյա ժամկետում:

ՆԱԽԱԳԱՀ

992

Գ. ԳԵՎՈՐԳՅԱՆ



2022 թ. Նոյեմբեր 09

Երևան